

Tingkat sistem pangkalan data

Arahan kepada Tabung Haji elak kes 'haji ekspres' berulang

>>Oleh Abdullah Wahab

abwahab@hmetro.com.my

KUALA LUMPUR: Kerajaan akan mengarahkan Tabung Haji meningkatkan sistem pangkalan datanya daripada digodam pihak tidak bertanggungjawab, sekali gus dapat memastikan kes 'haji ekspres' tidak berulang.

Menteri di Jabatan Perdana Menteri, Datuk Seri Jamil Khir Baharom berkata, pemantauan setiap masa perlu dilakukan Tabung Haji memandangkan isu itu sudah lama, namun belum dapat ditangani.

"Kita akan pastikan. Ini bukan soal orang menggodam saja, tetapi mereka yang tahu untuk masuk ke dalam sistem itu.

"Ada orang yang tahu dan faham IT dia akan masuk sistem itu dan 'key in' tarikh daftar untuk pergi haji.

"Nasihat saya, kita perlu ikut peraturan jika nak haji itu 'mabrur,' katanya, semalam.

Beliau berkata demikian selepas merasmikan Majlis Pelancaran Program Cinta Masjid TV Al-Hijrah, di perkarangan Masjid Saidina Hamzah, Kampung Batu Muda, Sentul.

Turut Hadir, Penggerusi TV Al-Hijrah Tan Sri Dr Mohd



MENARIK...Jamil Khir (kiri) dan Mohd Yusof menunjukkan logo Cinta Masjid sambil diperhatikan Bukhari (kanan).

Yusof Nor dan Ketua Pegawai Eksekutif TV AlHijrah, Bukhari Che Muda.

Akhbar sebelum ini melaporkan, sindiket diberi nama 'haji ekspres' membabitkan beberapa pegawai dan kakitangan Tabung Haji menawarkan orang ramai peluang menuaikan haji tanpa perlu menunggu giriran.

Jamil berkata, isu itu dibangkitkan sejak 2009, cuma sejak beberapa hari lalu ia diungkit media, manakala kakitangan didapati bersekongkol itu sudah dikenakan tindakan.

Sementara itu, mengenai Program Cinta Majid, Jamil berkata, beliau yakin program mengimarahkan masjid akan tercapai.

"Saya yakin dengan pendekatan inovasi dan diberi nafas baru, dapat menarik lebih ramai ke masjid."

"Kehadiran juga amat memberangsangkan dan fenomena baru ini disuburkan oleh TV Al-Hijrah untuk mencintai masjid," katanya.

Beliau berkata, program itu akan diteruskan setiap bulan di seluruh negara.